



Cumün da Valsot

Poz 86 • CH-7556 Ramosch
Tel. +41 (0)81 861 00 60 • Fax +41 (0)81 861 00 61 • info@valsot.ch • www.valsot.ch

Affischa

Suprastanza cumünala dals 17.09.2020

Presidi: Peer-Puorger Victor
Partecipant/s: Mayer-Schlegel Armon
Caviezel-Domenig Ursina
Kirchen-Werro Armon
Riatsch-Fedi Fadri
S-chüsà:
Protocol: Oswald Gian Claudio
Fabrica: Paulmichl-Rodigari Albin
Giasst/s:

tractandas	tema	responsabel
1	0120 Executiva Acconsentimaint protocol	tuots
2	0220 Uffizi da fabrica Planisaziun da finanzas e d'investiziuns Pels ons 2021 fin 2025	tuots
3	9630 Stabels da la facultà da finanzas Vendita da la chasa da scoula Tschlin Charta davart da Kämpfen Rechtsanwälte -	vp/go
4	1500 Pumpiers Pumpiers Muttler Revisiun obain rimplazzamaint d'apparats per respirar	vp/uc
5	7900 Planisaziun dal territori Revisiun totala da la planisaziun cumünala Fixaziun dals termins ed organisaziun da quels	fr/ap
6	0120 Executiva Orientaziuns	tuots
7	0120 Executiva Varia (suprastanza cumünala)	tuots

0120 Executiva

127 Acconsentimaint protocol

Il protocol da la sezzüda dals 27 d'avuost 2020 vegn approvà.

0220 Uffizi da fabrica

128 Planisaziun da finanzas e d'investiziuns

Pels ons 2021 fin 2025

Il capo spiega chi bsögna tenor HRM2 üna planisaziun da finanzas e d'investiziuns. Quella as cumpuona our da las cifras pel preventiv (2021) ed üna perspectiva pels prossems 5 ons (2022 - 2026). Per cha la manadra da finanzas possa cuntinuar cun sias lavurs, sun da ramassar las cifras da mincha singul dicasteri e da surlavurar las datas da planisaziun da l'on passà. Il manader tecnic repassa tuot ils progets da la planisaziun ed adattescha tenor bsögn l'otezza dals cuosts sco eir il termin da realisaziun. Implü vegnan discussiunats ils progets chi sun previs da realisar ils ons 2025 e 2026. Ün decisiun da princip davart da la suprastanza es, da far minch'on tantas investiziuns co cha'l cumün as po prestar. Id es d'evitar da stuvair tour sü mezs esters. Quai però gnarà fich greiv in connex culla realisaziun dal proget da la scoula. Quel as rechatta in elavuraziun, qua as calculescha però cun cuosts remarchabels. Il vicecapo manzuna in quist connex, chi füss da favurisar da vender parallel culla realisaziun dal proget la scoula chi nu serva davopro plü a l'organisaziun da scoula. Davo avair repassà tuot ils puncts deliberescha la suprastanza las datas a man da la manadra da finanzas.

9630 Stabels da la facultà da finanzas

129 Vendita da la chasa da scoula Tschlin

Charta davart da Kämpfen Rechtsanwälte -

Davo ün aboccamaint cun Corsin Biert ed Adrian Barbüda, rapreschantants da la Baineser SA, as vaiva spettà sün cifras detagliadas in connex cullas investiziuns vi dad installaziuns fixas e l'inventar. A man da quella d'eira previs da calcular ün'eventuala indemnizaziun a favur da la Baineser SA. Invezza es entrada üna charta davart dal büro da cussagliaziun giuridica Kämpfen Rechtsanwälte. In quella vegnan fat gronds rimprovers invers la cumischiun. Parallel cun quista charta han ils exponents da la Baineser SA contactà las medias ed orientà quellas da maniera per far noscha propaganda invers la cumischiun ed il cumün.

La suprastanza decida d'organisar ün termin per ün aboccamaint cul büro chi rapreschainta la Baineser SA per discussiunar ils prossems pass.

1500 Pumpiers

130 Pumpiers Muttler

Revisiun obain rimpazzamaint d'apparats per respirar

Ursina Caviezel preschainta las cifras da preventiv pels pumpiers Muttler. In quist connex manzuna ella cha'l cumandant da pumpiers, Angelo Horber, haja orientà ad ella chi saja da revidar ils apparats per respirar. Davo 10 ons sun da rimpazzar duos parts da quels apparats, quai tenor ledscha valabla. Concret voul quai dir cha la revisiun per mincha singul apparat cuosta pac damain sco ün nouv apparat. Il cumandant ha in quist connex procurà ün'offerta d'üna firma concurrenta. La cuostessan ils apparats pac daplü sco'l service da quels existents, però spordscha quella ditta la pussibilità da far ün contrat da servezzan, i'l qual es cumprais il servezzan da 10 ons. Quel

contrat da servezzan svest cuosts ca. fr. 2'500.00 l'on. Ils servezzans vegna sustgnüts per part cun cuntribuziuns davart da la sgüranza chantunala d'edifizis..

La suprastanza va d'accord cun expensas extraordinarias ill'otezza da fr. 50'000.00. In quist connex es però d'examinar schi nu füss pussibel da stipular ün contrat da servezzan culla firma chi fess il servezzan vi dals apparats chi's rechattan in possess cumünal.

7900 Planisaziun dal territori

131 Revisiun totala da la planisaziun cumünala

Fixaziun dals termins ed organisaziun da quels

Fadri Riatsch preschainta il plan detaglià insembel culs termins da l'exposiziun publica d'intervenziun, la radunanza d'orientaziun e la pussibilità d'audienzas privatas. Quel as preschainta sco segua:

1. Exposiziun publica d'intervenziun 26.10.2020 – 24.11.2020
Sala polivalenta a Tschlin (mardi, marcurdi e venderi -> 16:00 fin 19:00)
2. Radunanza d'infuormaziun 29.10.2020 – 20:15
Sala polivalenta a Tschlin
3. Audienza privata (max. 20 – 30 min.) 09. – 12.11.2020 + 17.11.2020, di da reserva
Termins tenor reseraziun telefonica

La suprastanza repassa la proposta e decida da cuntinuar cul intent sco elavurà e proponü davart da la cumischiun da planisaziun.

0120 Executiva

132 Orientaziuns

Via da god Vadrain

Il vicecapo spiega l'andamaint in connex cullas lavurs da proget pella refacziun da la via da Vadrain. In quist connex d'erian gnüdas tuttas prouvas da la sostanza da la via per examinar il cuntgnü. Displaschaivelmaing es gnüda constatada illas prouvas üna sostanza da bitumen fich donnagiaivla. Plü bod d'eira gnüda refatta la via cun recicladi d'asfalt, i'l qual as suppuona quel bitumen. Dürant las ultimas lavurs da refacziun es quel material, per stabilisar la via, gnü maschdà cun cement. A chaschun d'üna visita oculara insembel cul uffizi da god chantunal es gnü discussiunà in che maniera cha la via stuvest gnir refatta. Our dal motiv cha la sostanza es contaminada ha quella da gnir allontanada sün ün deposit da reactur. Quel fact chaschuna cuosts implü da frs. 200.- al meter curraint. Pella via da god Vadrain significha quai cuosts brüts implü da frs. 1'000'000.00. Pel cumün resultan uschè cuosts restants supplementars da frs. 230'000.00. Il vicecapo manzuna cha davart dal Chantun d'eiran gnüdas impromissas a chaschun da la visita oculara cuntribuziuns ill'otezza dad 80%. Illa notizcha d'acta però vegnan manzunadas cuntribuziuns da be 77%. El ha interveni e pretais cha quai gnia müdà. Fin al di dad hoz nun ha el però amo tschüff üna versiun da tal'acta culla correctura. Ils rapreschantants da l'uffizi da god han manzunà ch'in quist connex as po dumandar pro l'uffizi pella natüra e pel ambiaint per ün permiss per na stuvair allontanar il material pertoc. La schanzas da tschüffer quel sun però ourdvar pitschnas.

Acla da Fans

Il capo manzuna chi haja gnü lö la radunanza generala da la ditta. Tenor si'opiniun han ils respunsabels, sco conseguenza da las ultimas sezzüdas dal cussagl administrativ, trat las

masüras adequatas e necessarias per manar la ditta confuorm a las premissas. Specialmaing manzuna el cha'l Grenzshop a Martina vegn tgnü avert adonta ch'el causescha üna perdita. Da quel fan tanter oter eir adöver indigens, per part eir sco lö d'inscunter e per baiver café.

0120 Executiva

133 Varia (suprastanza cumünala)

Aldümers

Il manader tecnic orientescha cha duonna Gacomina Thom ha gnü ün discuors cun duonna Petra Spescha da l'uffizi pel svilup dal territori. La tschercha d'ün lö adattà pella realisaziun d'ün aldümer nun es amo conclüsa. L'ultim lö d'eira gnü sbüttà culla motivaziun cha quai restrendsches il purtret dal cumün. Davart da l'uffizi es lura gnüda sporta la pussibilità da realisar ün provisorium per maximalmaing 5 ons. Concret voul quai dir chi'd exista la pussibilità da realisar a Palingiava üna platta da beton cun ün ur e da plazzar sün quella ün container i'l qual pudess gnir deponà aldüm. Illa discussiun dal gremi vegn deplorà il cumport dal uffizi. Sco prüma es quai la lezcha dal cumün da trattar directamaing culs petents e da l'otra vart nu's va d'accord culla proposta. Eir invers ils Thoms nun es quai correct. Ils cuosts implü sun in relasziun bler mass'ots. Eir vegn miss in dumonda il fat cha la ledscha nu prevezza ingünas disposiziuns transitoricas.

La suprastanza decida da nun entrar sün quista proposta. L'uffizi e la petenta han da gnir orientats in quist sen.

7556 Ramosch, 05.10.2020



Il capo:

Il manader administraziun:

[Handwritten signature in blue ink]

[Handwritten signature in blue ink]